

唐滌生為新艷陽劇團新編第二部文藝奇情大悲劇

一入侯門深似海

公演于一九五五年二月六日在利舞臺大戲院

(版權留保)

當
劇
者

場
次

劇
中
人

西
樂

演員表

陳錦棠……………鄭道齡

芳艷芬……………
（先）沈玉珊
（後）沈翠鬟

歐陽儉……………鄭老夫人（反串）

梁飛燕……………盧夫人

白龍珠……………
（先）定海禪師
（後）盧世厚（西秦王）

陳惠瑜……………韋桂香

譚倩紅……………盧元素

麥炳榮……………沈夢樓

(頭場) (北京玉泉寺門前)

正面佛殿門口，掛兩個佛字燈籠，有「肅靜」「迴避」牌一對，正底景佛像，衣邊竹林，什邊大樹一棵，佛像有神枱，上擺檀香爐，燒黃香，衣邊台口紅几、蒲團，几上紅魚青磬

(四沙尼伴定海禪師衣邊台口坐蒲團合什介)

(開邊開幕)

(定海念白) 菩提本無樹，明鏡亦非台，胸中無一物，何處惹塵埃 (閉目敲卜魚介) (白杌) 敲罷青磬與紅魚，陣陣思潮唔自在，待我合指一算為何因，免打功課來阻礙 (撲燈蛾鑼鼓，合指一算關目點頭介續白杌) 原來算得不久有貴人來，老衲應等待，來者係西安留守鄭道齡，因為鄭太夫人居寺內，佢為探母病出京師，佢母在此養病曾三載，不久到此間，佢孝念可嘉殊可慨，因此惹孽緣，浮沉於苦海，信是命裏早安排，我不敢洩露玄機為更改，可見天意已如斯，可見幾許世人被情所害，唏噓長歎更無言，吩咐徒兒把來人待 (依舊閉目敲卜魚念經介)

(點，四手下、堂旦、兩侍衛先上介)

(鄭道齡「雪樓、雪帽、配劍」上長二流) 酬母愛，賦歸來，呢個孝子忠臣多感慨，遠離膝下忍作不孝兒孩(合)反哺心，誰懈怠，欲見親娘難忍耐，離京策馬到禪台，但望我母康寧健在(上)。

(下馬入寺介)

(定海一才口古) 西安留守，我都預料到你今晚一定呢探望吓太夫人嘅，可憐佢病染沉疴，寄寓禪房三載。

(道齡一才仄才口古) 定海老法師，家母好番未，我此來無非係探望高堂久病，我悔不該為斗米折腰，不過亞媽又話丈夫處世要立功名嘅，所以我難違慈訓，而且佢老人家，貪佛門清淨，所以在寶剎養病，不經不覺三年叻，真係騷擾曬，我希望佢早占勿藥，我一來探母病，二來有多少事想請教吓你，因為你係一個得道嘅高僧，能知過去未來。。嘅

(定海一才白) 哦，孝心孝心(口古) 你令壽堂經己好番曬叻，請問施主你有乜野指教呢，縱有甚麼

疑難，老衲可以竭力為施主解救疑難，你不妨明言大概。

（道齡喜介口古）吓，我亞媽好番喺，咁我就安樂咯，老法師，我想請教者，乃係事業前途，與姻緣兩事（一才）望你指點我痴呆。

（定海一才合什白）阿彌陀佛（起身向齡關目一輪嘆息介白杭）問前程，殊可慨，你本有慧根，不宜浮沉於宦海，須知富貴似浮雲，功名何足愛，你並非棟樑材，急流勇退休等待，明哲以保身，婚姻亦多障礙，禍福本無門，恐防你被溺於情海，從來因果報應最分明，祝君宜自愛

（道齡笑介花下句）我已宦途得意，自信是樑棟英才。。笑狂僧，有若說夢痴人，以我地位功名，更不信婚姻有礙。

（定海一才白）施主你唔信，請拭目而觀之啦，唔好講咁多叻，等我帶你入去睇吓令壽堂罷啦

（道齡白）有此侍衛過來，本官在玉泉寺會母，你們在寺外戒備，所有閒雜人等，不准內進，不得違

令

(侍衛領命與手下、堂旦出寺外守衛介)

(定海一笑揚塵佛與齡衣邊下介)

(鑼邊狂風暴雨介)

(大笛斗官叫介)

(快沖，沈玉珊「素色背心衫褲」抱斗官仆上躓地介，長嘆五才起身長花下句)風雨打梨花，飄零於人海，身世自憐多感慨，半帶悲時半帶呆，我父正直無私慘被權奸害，我幸與親娘弱妹，擺脫難和災。。才四月，慈母撒手塵寰，捨棄孤雛無母愛。(悲咽譜子撮口白)亞翠環，你唔好喊叻，鬼叫我兩姊妹條命生得咁苦咩，我梗要攜帶你，將你養育成人嘅，雖然我淪落到做一個紡織女，但係我一定負起做家姐嘅責任嘅，我記得我亞媽臨終嘅時候，吩咐我去玉泉寺，搵個西安留守嘅老母鄭太夫人，原來佢係我亞媽嘅金蘭姊妹呢，重話佢一定可以幫忙我嘅，噯，但係我究竟都係一個宦門之後，唔願向人憐尾乞憐，以免玷辱我父母嘅名聲，豈料禍不單行，同人

織個的絲綢，完全被人偷曬去，搞到我走頭無路，現在冇法子唔去搵鄭太夫人幫忙吓咯（欲入寺又徘徊介）

（力力古，桂香「紡織女」身上介見珊，先鋒鉞執住口古）亞玉珊，你咁就以為走得甩嘅喎，老實講吖，你如果唔想辦法賠番個兩匹絲綢畀大隻明，佢話過見你一次打你一次，相信你以後都幾難搵食嘅叻，精嘅你就搵錢賠番畀佢，我睇住嘅叻，你記唔記得佢係你背□打咗幾鞭，傷當要害。

（玉珊口古）桂香姐，你唔係代個個工頭呢逼我吖嗎，老實講吖，唔見咗人地嘅野，至多想辦法賠啫，佢唔應該咁打我嘅，我而家就係去想辦法賠畀佢嘅叻，人，係有同情心嘅，唔通你重忍心落井下石，幫佢呢逼我咩，你咁做法，未免太不該。

（桂香冷笑口古）哼，查實你都唔知係唔係賣咗人地幾匹綢，詐諦話畀人偷嘅啫，老實講，幫理不幫親，冇得賠賣妹都要賣呢賠畀人呀，你如果唔賠，大隻明係做工頭嘅，佢點樣向東家交代。

（玉珊怒介口古）桂香，你估我想失嘅咩，賠我就一定想辦法賠，不過講到賣妹就勢係假叻，冇膽嘅

就叫個工頭打死我咁笨，乜野咁緊張啫，如果佢打死我，一定要佢墊棺材。。呀

（桂香白）唉吔，重係度牙擦擦咯啫係嗎，輸唔輸我打你咁噃（先鋒鉞欲打珊介）

（霍夢樓「都頭」身什邊食住先鋒鉞上，見狀喝白）做乜野

（桂香一見夢樓白）冇，我同佢玩吓啫嗎（急足卸下介）

（夢樓扶起珊介口古）珊，我都叫你唔好做紡織女嘅啦，駛乜搞到咁飄蓬呢，噃，而家眼白白就畀人欺負叻，我雖然係官卑職小，係衙門做一個都頭啫，我話得到做得到，無論如何都要盡力維持

吾愛。

（玉珊長嘆口古）夢樓，我都知道你係愛我嘅，不過係衙門做一個都頭搵得幾多錢吔，我唔係睇小你，不過我了解你嘅環境，而且你屋企又有個亞媽，如果又要負擔我，重要負擔埋我個妹，你預知到你自己有幾大能力吔，所以我就唔想負累你，雖然你護花有意，無奈都要一任花落花開。。

（悲咽下淚介）

(夢樓頓足長二王下句)忍見你紅淚染桃腮，你是可憐一粉黛，願為花使伴妝台，一點痴心由憐生愛，知否愛情魔力，我已擺脫不開。。我不憐卿更有誰，你能否向郎示愛。

(玉珊反線中板下句)掩面暗慚羞，玉郎情偏重，枉君有意把花栽。。心底種情苗，相愛豈無心，相處之誠曾三載。謝你愛屋及烏，弱妹得你提携顧養，用去你不少錢財。。君有惜花心，何忍為我牽累重重(花)我為珍惜你錦綉前程，迫而拒愛。

(夢樓的的撐憤介白)玉珊，你咁講法係唔啱嘅(長花下句)我甘毀前程，願溺於情海，我只但求真心愛，豈無運到與時來，一朵鮮花逢蝶採，願與你走到天涯海角，盡把煩惱拋開。。花有意，蝶有情，你莫負我三年期待。(白)一條草一點霧，你駛乜成日話牽累我啫，只求你愛我，我同你去邊度唔搵得到兩餐吖(冤介)

(玉珊長嘆白)噉，夢樓，呢個社會究竟係現實嘅，空口講白話有乜用吖(花下句)為□我燃眉之急，迫我去借貸錢財。。你去去去，勸君你莫冤纏，我欲求援，要到玉泉寺內。(白)你扯啦，我

趕住要去同個位鄭太夫人借錢呀

(夢樓長嘆花下句)恨我點金無術，暗自悲哀。我去去去，去籌措金錢，嘆一句無可奈時無可奈。

(白)我都要去想吓辦法至得(黯然下介)

(玉珊徘徊一輪，閃縮欲入寺內介)

(甲侍衛喝介口古)喂，睇你個樣，鬼鬼鼠鼠咁，而且着起的襤褸衣衫，不許你入玉泉寺內。

(玉珊哀懇白)官長，我入去搵人架官長

(乙侍衛喝介口古)唔准，睇你行藏閃縮，精嘅就快躡開。(趕完與甲侍衛在門口瞋眼睷介)

(玉珊慢的無限感觸介花下句)慘被人聲聲驅逐，使我不勝慚愧更愁哀。不忍負知己，辱家聲，

不死更有何等待。(悲咽白)翠環，家姐再冇法子湊你咯，我死咗之後，人地見你咁可憐，一

定有的善長仁翁收留你嘅(放斗官於地，埋什邊樹解腰帶欲自殺介)

(行雷閃電介)

(道齡食住此介口衣邊卸上，見狀連隨執侍衛之刀撲埋斬帶救珊介一才口古) 喂，你為乜野事幹要死呢，如果我一步來遲，你經已走入鬼門關內。

(玉關抱起斗官行埋跪下口古) 大人，你雖然目前救得我啫，但係我嘅身世就唔想對人講，我真係冇曬人生樂趣叻，我要再死過，如果你係有同情之念，望你撫養呢個苦命小孩。(放下斗官，先鋒鉞欲再吊頸介)

(道齡一手執住白) 你唔死得(拉珊轉身仄才驚艷介口古) 你叫乜野名呀，你梗係一個棄婦呢定叻，你手上抱住呢個係仔吖，抑或係女呀，你雖然身世飄零，倒也生得艷麗端莊，好一個淒涼粉黛。

(玉珊口古) 我叫玉珊，抱住呢個係我妹呢嘅，我未嫁嘅，唉，你真係和藹可親叻，睇你個樣都知道係達官貴人啦，不過你何必阻我魂返泉台。

(道齡這個台口白) 蝦，點解佢口口聲聲要死呢，噉咗佢吖，惹起我嘅好奇心，查問吓佢至得(上前花下句) 我是西安留守，今宵探母到禪台。須知螻蟻尚且貪生，何以你甘願魂歸天外。

(玉珊乙反長二王下句) 一生能受幾重災，人到盡頭無所愛，蓮花遭萬劫，一死赴泉台，落絮飛花受盡權奸害，堪憐苦命與生來，還把弱妹提扶酬母愛，已是生無可戀，鳥之將死也鳴哀。一任花落花飛，你何必垂憐粉黛。

(道齡白) 玉珊，原來你嘅環境咁可憐，我都好同情你嘅遭遇嘅(反線中板下句) 憐此薄命花，佢恰似飄零柳，同情一念為花哀。菊蕊正清芬，好比蓮出污泥，一見竟生，憐愛。人類貴同情，何忍你風塵歷劫，我願把花栽。此際□逢卿，信是有前緣(花) 我願贈黃金，望把初衷改。

(贈金介)

(盧煙橋、盧元素扶鄭太夫人「持佛珠」衣邊食此介口卸上)

(煙橋、元素見狀不悅介)

(夫人慢的的關目一輪，狂喜白) 咦，你唔係沈玉珊(口古) 玉珊亞玉珊，唔見咗你咁多年，經已長得亭亭玉立叻，我聞得你父被害於權奸，而且又抄咗家，後來又好似聽見話你亞媽帶咗你兩姊

妹脫險，而家你亞媽是否仍健在。

（道齡、煙橋、元素不期同白）咦，乜你識佢架

（夫人點頭介白）係，佢係我舊時金蘭姊妹個女啫

（玉珊跪介口古）太夫人，我亞媽經已唔係處叻，佢臨終嘅時候，重千叮萬嚟，吩咐我呢搵你嘅，佢話你地嘅感情，重好過同胞骨肉，我因為唔想玷辱我父母嘅名聲，而且我感覺到呢個世態炎涼，人情冷暖嘅社會，所以我至唔敢呢搵你，情願自食其力，呢維持我個歲幾大嘅妹，難得你不忘故舊，殷殷垂問，我不禁悲從中來。。（悲咽介）

（夫人一路聽一路垂淚悲咽白）哦，乜原來你亞媽留低你兩姊妹就過身嚟，咁就真係可憐咯（花下句）
慘見你呢對淒涼姊妹，我不禁無限悲哀。。你賢且美，我欲想乖仔你娶佢做妻房（一才）我索性慈祥，斷唔會話人不在時情不在。

（的的撐，道齡、玉珊同關目暗喜，煙橋、元素同作妬憤關目，各□表情介）

(煙橋口古) 亞大姨，肥奶奶太夫人，乜你咁耳仔軟架，同人地十句偈都未傾完啫，就想娶人做心抱咯，你發心抱寒咩，你監硬迫個仔啞嫁盲婚都得嘅，道齡實鍾意佢嘅喎，婚姻關乎終身幸福啫，如果將來唔好嘅，聽埋怨你嘅啫，乜咁兒嬉架，結婚啫，你估同買棵菜。咩

(元素口古) 係囉姨媽，你要考慮清楚至好呀，亞表哥同佢素昧平生，都有情感嘅，點可以結合嘅啫，咪話我口多話你吓姨媽，我首先聲明一句，我冇企圖架，不過我同亞表哥就唔同呢，我話曬都自少嚮你屋企寄居長大，同亞表哥朝暮相對，大家嘅感情好好嘅，噏乜，咪話我唔怕醜講句叻，反為我同表哥結合就好應該。。

(道齡台口白) 哼，咁唔知醜，毛遂自薦都有嘅啫

(玉珊的的由慢打快關目台口花下句) 自愧山雞未敢諧鴛侶，攀龍附鳳本不該。。忙跪叩，拜謝太夫人，我福薄自慚，更不敢奪人所愛。(白) 太夫人，你都係收回成命至啱嘅

(夫人的的撐震怒戩拐杖怒白) 邊個話唔啱(一才) 邊個敢反對(一才) 我係都要亞齡娶你(一才)

相信亞齡未必有膽忤逆老母（長花下句）飲水要思源，深恩留腦海，若非佢母撮合姻緣，我怎嫁得入鄭家門內，若非佢父栽培之力，我先夫怎得位列藩台，我苦病三年，未忘屋烏愛，決意娶玉珊為媳婦（一才）以慰佢父母魂在泉台。報深恩，更要把佢父母骨石迎還，呢對婚姻，劫難更改。（白）就算亞齡唔鍾意，我都實行揸主意咁做嘅叻，你敢唔敢反對我吖

（道齡白）我絕對遵從亞媽嘅教導嘅

（煙橋台口花下句）我個女居然畀佢撬牆腳，以後我都唔駛希望散佢鄭氏家財。佢入咗鄭門就係我嘅眼中釘，重慘過掘咗我祖宗十八代。

（元素台口花下句）多年好夢如今碎，可憐合歡花向別人開。暗怨姨媽佢不通情，此後呢個痴心女兒，徒把相思害。

（道齡花下句）孩兒謹遵慈命，珊妹你不怕把心事道來。我有憐香意，更有惜玉情，不過我妬性天生，最易翻醋海。

(夫人喜介白) 係咯乖仔，你應承呢段婚事，亞媽好歡喜，亞玉珊，你又點意思呀，唔怕開心見誠嗜
(玉珊羞介長花下句) 杏面泛紅霞，鮮花逢蝶採，又恐怕一入侯門深似海，為着提携弱妹，免至佢失
學於將來，為恢復門戶家聲，更免把夢樓前程礙，更可迎歸雙親骨石，免做一個不孝兒孩。

儂嫁後，夢樓只當我失踪(上前介) 沈玉珊何幸得齡哥與老夫人垂愛。

(夫人白) 咁就安樂曬咯

(煙橋嘲笑介口古) 哼哼，真係一百歲唔死都有新聞聽呀，估唔到一個政海紅員，居然娶一個咁下賤
嘅紡織女為妻，我話畀佢影衰鄭門嘅光彩。

(桂香食住此介口卸上偷聽關目介)

(元素口古) 唉吔亞爹，世事嘅野好矯嘅，人地都有階級觀念咯，娶豬娶狗都聽得佢啦，駛乜咁睇唔
開。。吔

(道齡火介口古) 喂，好咯嗜，你兩父女都唔駛一個彈時一個唱架，慘得過我地一見鍾情，天作之合

咩，而且奉母命成婚嘅嘢，唔該你地咪咁多口批評叻，你地太頑固（一才）太自私（一才）唔抵得咩，我重要話過以後同珊妹恩恩愛愛。添嘴

（玉珊喜介口古）但願石爛海枯無中變，願郎情重把花栽。。

（夫人喜介白）我敢話亞齡始終都咁愛你，包佢聲都唔敢對你大一句架珊（花下句）娶媳但求賢且慧，家姑何妨作痴呆。。今病愈，更喜愛子成家，可謂雙喜臨門，傳命快回府內。（與眾同下介）

（桂香連隨閃避俟眾人去後，復卸出憤介不平白）蝦，估唔到亞玉珊因禍得福添，好，你咁快活咩，煮鑊你嘆吓至得（沖下介）

（快沖，桂香連隨拉夢樓上介）

（夢樓口古）桂香，你所講嘅說話真唔真呀，我相信亞玉珊未必咁貪慕虛榮嘅，你唔駛講是講非叻，玉珊始終將我愛。嘅

（桂香口古）愛吖嗎，金就愛囉，銀就愛囉，有成個留守夫人都唔做，愛你，笑話，我親睇住佢應

承太夫人嘅婚事，你想佢嫁你呀，除非佢第世投胎。

（夢樓的的撐力力古又妬又憤介大花下句）恨愛人（一才）甘婚變（一才）難堪刺激變痴呆。我要報復（一才）去殺負心人（一才）此際妬火如焚翻醋海。（先鋒鉞欲下，一才窒腳頓足失意垂頭不語介）

（桂香一才詫異口古）咦，你又話去殺個雙百變狐狸，正話講得係威係勢咁，點解忽然又喪氣垂頭，把初衷變改。

（夢樓一才長嘆口古）噉，殺鬼殺馬咩，我不負人，寧人負我，佢不仁，我何忍為不義，算叻算叻，好夢難圓嗟福薄，我家中尚有一個慈祥嘅老母，我何忍為愛情而犯罪，做一個不肖兒孩。

（桂香憤介白）衰得佢咩，咁就縮沙咯喎，畀着我同佢搏命呀，抵得你咩，冇呢火氣都做得人成嘅，死咗佢啦（以口呸之下介）

（夢樓花下句）佳人已屬沙陀利，以後心兒破碎夜夜哀。。（失意下介）

落幕

(第二場)

(花園衣邊小樓景，什邊正面瓊樓景)

佈景說明：什邊瓊樓，正面底景為走廊，什邊角有園門口，衣邊角佈一小樓，有長梯級可上二樓，煩

塵影注意佈妥

(排子頭一句作上句開幕)

(煙橋衣邊角上介台口花下句) 一自道齡新婚後，我呢個老人坐卧兩不寧。十年好夢已經完，富貴

繁華成泡影。(白)明明呢一間咁大嘅豪門，呢一筆咁大嘅財產，係落在我個女亞元素手上嘅，

我都唔知用盡幾多心血，點知無端白白殺出一個沈玉珊，將我嘅心血化為烏有，你話我點至害

得佢死呢(寶子)

(飛燕拈藥一包從衣邊樓下介)

(煙橋口古) 亞燕，呢劑藥係邊個食呀，你原本係我個妹子呢嘅嚟，而家肥奶奶叫你服侍新少奶，好

叻咩，為乜野事幹我問你十問九唔應。

(飛燕口古) 噏咗，我點敢咁大膽吖，呢劑當歸頭係煲比少奶補身嘅，亞少爺臨上朝嘅時候，對我囑咐叮嚀。。

(煙橋口古) 亞燕，你即刻拈的當歸頭靜靜去換啲的當歸尾，重要落多幾錢……(咬耳朵介) 若果事成之後，比三五七仟你都話唔定。

(飛燕口古) 噏咗，咁黑心害人點得架，不過我都會照做嘅，妹仔釘有邊個唔貪兩字虛榮。。(什邊瓊樓下介)

(煙橋白) 呢個計劃成唔成功，就難於逆料嘅，等我班齊的家屬出呢，由上至下煽動一輪，我食飽飯之後，除啲做呢的事之外，重有乜野事做呢(向內場亂叫，三姑奶奶、五孀、七姨娘、四姑奶奶，並亂叫梅香名字)

(八梅香、三姑奶奶、五孀、七姨娘、四姑奶奶在正面走廊內分邊卸上問何事介)

(煙橋大聲煽動口古) 喂，三姑、五孀，你覺唔覺得亞齡娶咗新家嫂之後，減削咗你地從前嘅地位呀，

你地點解重咁安靜。呢

（四老婦交頭接耳點頭介）

（煙橋繼續口古）你地坐嚮處飲杯茶呀，等個新家嫂行過要比的辣椒佢食吓至得咯嚟，如果唔係呀，

包管唔駛一年咋，你地就要離開呢一所大家庭。。（白）你知唔知個衰婆乜嘢出身吖（埋走廊

向各人細聲煽動介）

（元素陪玉珊什邊角轅門口上介）

（玉珊台口花下句）鎮日深閨殊寂寞，幸得表姑對我甚多情。。做人媳婦甚艱難，枕衾前皆淚影。

（元素花下句）你今日有夫尚且愁寂寞，須知雲英未嫁比你更孤零。。解愁唯有伴嫂行，日夕有如形

共影。（二人入介）

（玉珊一才慢慢的的笑介白）衣衣，點解今晚你地咁齊全呀，三姑奶奶，四姑奶奶，我都好想去同你地

請安嘅叻

(三姑口古) 吓，躡開啦，邊個駛你請安呀，不配呀，你係乜野身屍蘿蔔板啫，亞肥奶奶同亞齡就咁
 悞啫，我地的老人家好醒。嘅啫

(煙橋插白) 鬧得好

(玉珊重一才慢的的苦介白) 我雖然係未嫁入呢之前淪落過啫，但係我始終係個官門之女，你唔信就
 問吓，五孀七姨娘啦

(五孀口古) 咪問我，我唔識你，你呢個紡織女千祈唔好行差踏錯添啫，如果比我地揸住你多少痛腳
 呀，就烹你離開呢個大家庭。(白) 我地唔好蘇佢，番入去早的抖(與梅香等分邊卸下介)
(煙橋冷笑白) 嗚呵，新心抱自討沒趣呀

(玉珊慢的的台口長花下句) 苦隨心上起，淚向眼中凝，方信豪門面目甚猙獰，若非夫婿多情憐苦命，
 一任春風秋雨捲浮萍。。含悲淚(一才) 帶愁容(一才) 此際愧無以應。(苦喉白) 人地越睇
 我唔起，我就更加要自己睇得自己起，以後我萬講話唔敢行差踏錯呀，我說話都唔敢講，人都

唔願見呀，慳埋嚮小樓之上，過渡殘生就算叻（掩面哭泣頓足上衣邊二樓卸下介）

（元素怒介口古）亞爹，你開呢（介）知女莫若父，一切一切都係由你佈局嘅，你為乜野害到亞表嫂咁樣，難怪佢對你唔尊敬。呀

（煙橋怒介口古）衰女，我咁樣係為邊個呀，我為咗你點只想趕到佢絕呀（一才）重想害到佢死添，衰女，你的血係冷嘅咩，你為邊個犧牲咗兩字愛情。。

（元素先鋒鉞伏於石枱上哭泣介）

（煙橋拍枱鬧白）世間無毒不丈夫，你為乜野事要讓咗亞齡畀人咁笨吖，失咗嘅野要攤得番至係架嗎

咩女（拍枱下介）（卸下衣邊角）

（元素慢慢的抬頭狠然白）一言驚醒夢中人，亞爹嘅說話係咁嘅

（快沖）（夢樓上台口花下句）休說侯門深似海（一才）踰牆闖入牡丹亭。。不知何處是紅樓（一才）

好比浪蝶迷離穿花徑。

(元素口古) 衣衣，你呢個陌生人呢搵邊個呀，亂樁亂樁，如果你呢過嘅，點會不分路徑。

(夢樓口古) 我係呢搵鄭夫人玉珊小姐，我迫不得已而想見故人一面，我同佢實在有一段好深厚嘅交情。。(作焦急央求狀)

(元素這個台口口古) 呢次我機會到叻(笑介)你嚮處坐一陣先，本來我個新表嫂就話過唔見人嘅叻，不過我一望而知，你共佢並非泛泛之交，所以我至幫忙吓你，等你把舊人重認。

(夢樓口古) 多謝曬你叻，到底你係邊位小姐呀(介)我希望你顧全鄭夫人嘅體面，唔好向人洩漏我地今晚偷偷會嘅情形。。

(元素白) 得叻(介)表嫂呀表嫂，快的落呢啦，我有的好緊要嘅事情想同你講

(云云)(玉珊(雪樓)落樓一望大驚白)表姑娘，你為乜野事要害我(先鋒鉞欲下介)

(元素先鋒鉞口白)表嫂，咪咁傻啦，我陪咗你幾個月你都唔知道我好咩，傾幾句唔緊要嘅，我同你
把住風，點都唔比亞齡表哥知道唔係算囉(急足向什邊樓下)

（夢樓、玉珊重一才慢的的逐漸行埋介）

（玉珊口古）夢樓，你做乜野事幹重要呢搵我呢，今時不同往日，你都知道我處在呢種不同嘅環境。

（夢樓悲咽口古）玉珊，假如我唔受咗刺激我唔會失業，唔會飲酒（一才）唔飲酒就唔會闖咗呢場大

禍，我亞媽因為我而比人扣押咗叻，我希望你借二百兩銀畀我，將佢救營。

（元素一路拉道齡一路咬耳朵什邊瓊樓卸上叫道齡慝埋然後坐於瓊樓大聲白）表嫂，你地即管傾啦，

有我嚮處把風，乜都唔怕講嘅

（玉珊白）多謝曬你叻表姑娘（介口古）夢樓原本我想除曬的首飾比你嘅，不過都係唔好叻，事關有

色認。呀

（夢樓口古）我都知道你好艱難叻，我都唔係幾想闖入富貴門庭。

（玉珊花下句）今夕小樓人睡後，我當從險處解你難中情。當年恩義要酬還，當把舊事重細認。（細

聲在夢樓耳邊講幾句則上小樓卸下介）

(夢樓白)我都要慳埋先至得叻(衣邊角卸下介)

(道齡慢的的開台口花下句)說甚麼枕伴恩情如海樣(一才)今宵經已化為零。(先鋒鉞)執手重

問把風人(一才)你要一說夜來光景。(用火迫介)

(元素白)睬，你咁惡做乜野啫(木魚)千日都係表嫂做人唔生性。做乜你睜眉突眼望住我咁得人驚。

呢一朵出牆紅杏難怪你啼笑不成。表嫂叫我偷把銀燈引玉郎，試問我點能唔答應。紅娘遞東

我都知道責任非輕。我共同你誼屬表親，又唔想你埋於陷阱。噏吔，真掃興。咯，點知咁快

有人私會牡丹亭。(白)係咁多叻，其實我對你好至通知你嘅啫，你忍吓氣啦表哥，老婆靚

至有人吼啫，唔通你娶咗我都會有人吼咩(一笑下介)

(道齡花下句)今夕小樓人睡後，豈不是草木皆兵。(慢的的拿實面口一步一步上小樓介)

(落幕)

(第三場)

(華麗房景連房門外佛堂景)

佈景說明：什邊立體門及窗，窗外音樂台之旁佈佛像，有枱青磬紅魚等物兩邊落黃色帳幔，可以隱埋

一人，房內衣邊大帳，衣邊台口枱，正面亦有小觀音像，衣邊搖籃斗官

(四梅香企幕)

(排子頭一句作上句開幕)

(快地錦)(秋荷拈香兩炷上在門外佛堂插一炷，入房觀音像前插一炷，然後台口白杭)朝焚香，晚

焚香，夫人長年吟佛偈，燒少一炷香，當堂發啲禮，一年最大宗，就係香燭火臘燈油費，日日

咁拜如來，唔知個如來聽唔聽佢駛

(四梅香用朱貧捧小禮盒載雞蛋、蓮子等物，伴老夫人上介)

(夫人拜完佛後台口長花下句)日日敲紅魚，晚晚唸佛偈，我原本在佛門來渡世，好待今生罪孽化雲

泥，娶媳焉能憑顯貴，可惜藥爐煙繞個一位新抱初歸。更嘆一句世態炎涼，所以我要對個心

抱時加安慰。（入房叫梅香擔橙坐於台口然後白）亞玉珊一入咗門，個身體就唔係幾好，一日比一日憔悴，佢又諱疾忌醫，我都唔知佢乜野病（介）雖然人人都叫我做肥奶奶，但係我肥得呢係倒囊嘅，隨時都可以躓低嘅，所以我都冇乜野想，只有想抱番個孫仔啫（介）長安街個個拜神婆好靈嘅，前日我叫佢去金花廟作落個福，佢叫我將拜完神的紅雞蛋同埋糖蓮子，靜靜地收埋嚮家嫂房度，七七四十九日，就得嘅叻（白）秋荷，嚮個小禮盒裏便，揀一對紅雞蛋，同埋七粒糖蓮子，靜靜地擺嚮少奶枕頭底下（講完閉目唸佛珠介）

（秋荷一路掩口笑一路照做介）

（快地錦）（飛燕用朱盆捧藥一碗上，見夫人略帶驚慌介）

（夫人一才問白）飛燕，你捧住呢碗乜野呢呀

（飛燕驚慌白）係係係，係補藥呢嘅，特登煲呢拈畀少奶飲嘅嗎

（夫人笑介白）亞燕，快的拈碗藥擺嚮枱上便啦，搵的嘢畀住佢，唔好比佢凍咗

(飛燕急足將藥擺於枱上則下介)

(夫人白)好，等我唸幾句經落碗藥裏便，等亞家嫂飲咗佢好身好運，連生貴子至得(寶子唸經介)

(玉珊食住譜子上一路上一路度台口嘆息花下句)愧無愛念酬知己，怎得黃金救災危。愁雲輕罩病

中人，未敢稍洩前緣求夫婿。(白)我呢個病係比人打傷嘅，我現在嚮鄭家已經比所有人睇唔

起叻，我更唔願因為有呢個痛症而透露出我以前卑微嘅執業(介)亞夢樓係一個好曠達嘅人，

我不能不幫忙佢於今晚，首飾係亞道齡畀我嘅首飾，我不止唔敢，我簡直唔願損失半件，我又

不能向亞道齡要錢，唉，咁點呢(一才向房內關目介)唔怕，唔怕，好彩我個家婆待得我好，

有呢位肥佛嚮度，就乜嘢困難都可以解決嘅(在佛前拜幾拜求保佑後則拍心口於膽入房介白)

奶奶，乜咁啱你入咗我房呢，我有一件事想求吓你

(夫人笑介白)嘩，婆媳之間無所謂你求我，我求你嘅，玉珊快的飲咗碗藥先，我至同你講，我成晚

看住碗藥慌佢凍，唔知幾心焦呀，去飲啦

(道齡滿面怒容食住此介口上，見狀不入門，在窗外偷聽介)

(玉珊口古) 奶奶(用眼色令梅香退後一點) 我想問你借住貳百兩銀，雖然我有得食有得着，但係我

過兩日就番鄉下叻，我為夫家嘅體面起見，我都要對的窮親餓戚稍加救濟。

(道齡一才在門外強烈反應介)

(夫人口古) 啲，玉珊，駛乜借借聲吖，就算我畀你都好應份嘅，我時常叫亞齡畀錢你，佢總唔聽我

說話(細聲) 一個人有錢行步路都唔同架，喲，我家畀三百兩銀過你，有錢旁身，就唔駛由上

至下都將你睇低。。(喝梅香退後，靜靜交三百兩銀單與玉珊介)

(玉珊袋於懷中口古) 奶奶，我真係唔知點樣多謝你至啱叻，假如唔係你處處維護住我，鄭家重有邊

個睇得我起呢，我都唔知今世點樣酬答婆婆嘅恩惠。

(夫人笑白) 玉珊，你想報答我呢個肥奶奶容乜易啫(口古) 生番個孫仔比我抱唔係得囉，不過你於

心啦，你梗有得生嘅，因為我整咗多小鬼馬，嚮你間房裏底。。(平聲)

(玉珊笑介白) 奶奶，你嚮我間房整咗乜野鬼馬呀，講畀我聽啦

(夫人神秘笑介白) 嘩，講得比你聽就唔算得係鬼馬啦，比你知道就唔靈叻，七七四十九日我至話比你聽啦，秋荷，扶我入書房，你地幾隻野跟我入去，唔好嘈住少奶少爺早的抖(與梅香衣邊房

卸下介)

(玉珊台口向觀眾白) 你話的咁好嘅家婆去邊度搵吖，整定亞夢樓有福叻(此句特別大聲)(花下句)

好比觀音灑下楊枝露(一才)(大聲) 尤如大旱得雲霓。 冰心解救難中人(一才)(大聲) 無可奈何都要瞞夫婿。

(道齡聽至大聲之處俱起強烈反應，磨拳擦掌欲入找晦氣介)

(大笛斗官喊介)

(玉珊急行埋嚟斗官介白) 亞鬟，二妹，你唔好喊，舊時好愛錫你個位夢樓哥哥(除夢樓哥哥四字其餘大聲) 今日呢咗呀，亞鬟你重記得嗎，除咗佢之外，冇人有佢咁愛錫你嘅叻(將斗官抱回搖

籃則微覺精神不舒服介)

(道齡重一才慢慢的台口切齒關目完台口花下句)一陣酸風和醋雨(一才)方信玉娘婦德已全虧。

蛛絲馬跡已分明(一才)欲拈寶杖鋤佳麗。(在佛像前有老夫人常用之金頭拐杖)

(夢樓什邊角內場細聲叫白)玉珊，玉珊

(玉珊一才關目介)

(道齡食住一才慝埋佛像之旁以黃帳遮身介)(快寶子)

(夢樓什邊角欄杆外卸上介)

(玉珊食住快寶子出房門拉夢樓台口口古)夢樓兄，原本你需要二百兩嘅啫，但係呢處有三百兩，呢

張銀單，係認單不認人嘅，你即刻拈去換咗之後，靜靜地拈番一百兩呢比我駛。啦

(夢樓口古)玉珊，我重你一入侯門深似海，估唔到你呢個有心人憐貧仗義，對於舊事尚未忘遺。

(欲下)

(道齡伸頭出黃幔一才關目介)

(玉珊急足入房再急足出房拉夢樓台口口古) 夢樓兄，我同你已經再有機會可以講說話嘅叻，你以後唔好再飲酒，你原本係一個大好男兒，何必甘把前途摧毀。

(夢樓重一才慢慢的苦笑介口古) 玉珊，相信我惡劣嘅心情唔講比你知，你都知道叻，有邊個寧願在醉鄉沉迷。。

(道齡強烈反應介)

(玉珊急足入房，再急足出房白) 夢樓，你咪行住(急足埋搖籃抱斗官出房拉夢樓台口細聲口古) 夢樓兄，二妹之幾個月就日夕都係你懷抱當中，我而家抱佢見一見你，聊謝你當日憐孤嘅恩惠。

(夢樓重一才慢慢的悲咽口古) 翠鬟，你而家好叻，你而家生長侯門之內，享不盡榮華富貴，希望你將來大個時候，見番我唔好將我睇低。。(一路喊一路叻斗官一才關目白) 衣衣，玉珊，點解

佛前個張黃布帳郁吓郁架

(玉珊白) 哦，大概係風大都唔定啫，咪鬼理佢啦，我地今晚呢一種悲苦嘅情形，就算如來佛祖見到都會感動嘅

(夢樓最後狂吻斗官黯然下介)

(玉珊亦抱斗官黯然入房介)

(道齡咬牙切齒關目一輪鑼鼓做手撇喉花下句)幕後人(一才)好比玄壇怒目(一才)決把慧劍橫揮。

待我舒笑面(一才)歛愁容(一才)我生平亦擅於作偽。(拈寶杖入房，將寶杖放於牆邊強笑坐下介)

(玉珊已覺辛苦一才強笑白)道齡，乜你今晚咁晏正番入房，你去邊處呀

(道齡強笑白)冇，我嚮書房陪亞媽睇書啫(口古)呀，玉珊，亞媽話比我聽，話比咗三百兩銀單畀你，呢幾日唔係銀期，慌怕擺唔到，吩咐我比三百兩白銀比你，換番張銀單，你家婆做事都算得非常精細。(埋帳後取白銀坐回白)喲，錢就嚮處，比番張銀單我啦(迫介)

(玉珊重一才慢的的大驚口古)好啦，好啦(台口介)唉，死叻，個家婆愛我，重反為累咗我添，佢明知我唔想比亞齡知嘅，點解又要偏偏同亞齡講呢(作狀一輪苦笑介)蝦，我唔知點解咁冇記性，張銀單唔知擺嚮邊處添，呀，或者比大風吹咗去都唔定呀，我近來病到的記性好曳。

(道齡冷笑白)玉珊，大風唔會吹咗張銀單去(一才)大風只會吹郁佛前個張黃布帳啫(包重一才)
(玉珊食住重一才愕然驚慌介)

(道齡口古)玉珊，你袋住張銀單，未曾出過房門口，除咗有人入呢同你擺咗張銀單之外，張銀單決唔會飛咗出去嘅，至於有邊個人共你咁深淵源，可以穿房入舍呢同你擺咗張銀單呢，嘿，我相信你對佢嘅熱情，更甚於你眼前嘅夫婿。

(玉珊重一才慢的的口古)道齡，總之我無負於你，我並冇背咗你做出乜嘢虧心嘅事，何必為一張銀單，而對我濫用其威。(白)我……我最多點辛苦都搵番張銀單比亞奶奶嘅啫，奶奶比咗我，你唔應該迫我擺

（道齡重一才慢的由冷笑轉狂怒介一巴兩巴打玉珊推掩門一掌打玉珊背門躓地介）

（玉珊舊傷復發，欲吐血又幾回忍住介）

（道齡更怒白）嘿，輕輕地搵你兩巴，推你一掌（口古）我唔信你辛苦得咁交關，有血，你就即管吐

咗出呢，如果吐唔出嘅，就証明你工於作偽。玉珊，我愛你，以你卑微嘅身世而嫁到我，我估

唔到你冇呢種不忠實嘅行為。（作狀再欲打介）

（玉珊慢的的捧心作欲吐血狀介）

（道齡見狀氣至兩頭跳介白）嘿，你個槓嘢都比我識穿曬叻，你重要嚮處惺惺作態，唔怪得話美人搵

跳，姣婆詐嬌，有血就即管嘔兩啖呢比我睇吓啦

（玉珊忍住血苦笑白）道齡，你咁愛錫我，點捨得打到我嘔血呢（藥力發作更多辛苦狀態）

（道齡怒白）呸，我明知道你係詐嘅（躓坐於椅上不理玉珊介）

（玉珊悲咽白）道齡（小曲春風得意一路唱一路跪埋介唱）痛哭，訴冤對郎啼，望君原諒我，傷心往

事太慘淒，我縱如今顯貴，當日寒微，幸得霍氏提携（序悲咽白）道齡，道齡，我不過幫忙一個難中知己，我同佢有乜嘢淵源，有乜嘢瓜葛呢，其實我對佢都係還恩還義嘅啫（掩面哭泣）

（道齡接唱春風得意）對我情緣盡廢，今宵窗外，總之婦道永虧，雖記受我恩惠，婦德已虧，任你講乜都唔實際。嘅（掬開玉珊介）

（玉珊接唱春風得意）今夕逢劫厲，應向郎下跪，自慚命裏悲今世，舊日情形再莫提（序白）其實我都不必瞞你嘅，就係因為我知道你個人多疑善妒，就算拈你多少金錢去幫忙吓舊時嘅朋友，都係你嘅面子呢啫（曲）我實報答恩惠，你莫被疑雲自迷，今宵悲嘆向郎啼，望郎諒我莫再執迷（喊白）可惜翠鬟重細個女，唔會講說話啫，假如佢三幾個月頭就有性，佢將來大個就會講清講楚比你聽嘅

（道齡重一才慢慢的白）翠鬟（一才冷笑）翠鬟（一才冷笑）（喝白）你地的妹仔釘一隻一隻都躡曬去邊處（大聲嘈叫介）

（八梅香與秋荷食住叫聲分衣什邊卸上介）

（玉珊見狀驚惶失措介）

（道齡喝白）秋荷，抱亞翠鬟呢比我

（秋荷急足抱斗官交道齡介）

（道齡抱斗官慢的的關目一輪口古）玉珊，我一向都好信任你，但係一次不忠，百次不容，我對你挽入呢呢個都發生疑問叻，到底呢個係你親生妹，抑或係你私生女（一才）我要將佢無情勒斃。

（先鋒鉞）

（玉珊食住先鋒鉞搶回斗官一路喊一路憤然口古）道齡，你應唔應該搵都搵曬咁多下人出呢當眾侮辱

我（一才）我在你嘅地住已經夠衰嘅叻，假如呢個係我嘅私生女，試問我為乜野事幹要嫁你，

你講出呢句咁嘅說話，真係不入倫理範圍。（火介白）秋荷，你抱番翠鬟埋去等佢好好地睷，

一個人迫到絕路嘅時候，乜野都敢做

（道齡火介白）你當然乜野都敢做啦（先鋒鉞執玉珊口古）玉珊，假如呢個唔係你嘅私生女，斷唔會比入呢個個人呵完又呵，錫完又錫，你估真係風吹黃布幔咩，其實我一早就慳埋嚮布帳裏底。

（玉珊重一才慢慢的捧心痛苦，漸轉憤怒口古）道齡，我都辛苦到就呢死嘅叻，我都唔希望你迫到我死都死得唔清白，你應唔應該以一種鼠摸嘅行為（一才）呢窺探你光明嘅妻子（一才）如果傳揚出外，連帶你都會比人睇低。○嘅咋（搵道齡兩巴頓足向衣邊欲下介）

（道齡火介執住背後白）你去邊處

（玉珊白）我要入去書房見過奶奶之後，下堂求去

（道齡火介白）你估下堂求去就可以了喇咩（執玉珊三搭箭褪前褪後，褪去玉珊之披風着紫標衣底，用力一搵玉珊散髮，掩門躡地介）

（玉珊散髮掩門躡地欲嘔血又忍住一味喘氣介）

（道齡見狀頻頻頓足白）又試詐叻（雙句）（火極）所謂針唔到肉唔知痛（一才）倘留餘地你唔肯認

(一才) 我係一個鍾於情愛嘅人(一才) 但係有時可以變做辣手摧花之鬼(先鋒鉞拈寶杖霸腔芙蓉唱) 在此無情棒下，我要你表露無遺。。(欲打又不忍棒不能貼身) 是誰個蕩子踰牆，與你在窗前談腑肺。(欲打不忍介) 翠鬟是誰家孽種，與佢有狂吻行為。。(欲打不忍介) 揮淚打金枝，誰知我背人垂涕。(欲打不忍介) 一念到緣關香火，問誰肯杖殺其妻。。(花) 無情棒(一才) 有心人(一才) 都係無非裝腔作勢。(手軟軟頹然坐下口中仍鬧白) 打死你吓拿(雙)

(玉珊慘叫白) 呢次我死叻，道齡

(道齡火怒介白) 又詐囉，你明知我唔捨得打你，你偏偏重要詐我(悲咽) 鬼叫我個心都重係愛你咩，你點對我唔住都得嘅啦，得嘅啦(啾咽介)

(玉珊沉腔花下句) 唉吔吔，唯將碧血灑春泥。。(藥發鑼鼓嘔紫標，背門有紫標)(好比血人一樣)(道齡重一才慢慢的成個札起介白) 玉珊，乜你週身都係血呀，我幾時有打到你(雙句) 我拈住呢枝佛杖，係咁打(雙句)(拈寶杖作狀一輪反問梅香狂問白) 你地睇住嘅啦(雙句)

(眾梅香同白) 我地嚮後便點睇得真呀，少奶就梗係你打死嘅叻，冇打又點會有血啫

(道齡慢的的成個傻曬白) 乜咁都會打死人架(雙)(突然狂叫白) 玉珊，玉珊(力力古)

(夫人食住衣邊上)

(元素、煙橋、飛燕食住此介口什邊上入房見狀大驚介)

(夫人慢的的向地上之玉珊，手上之寶杖，關目一輪先鋒鉞執道齡口古) 亞齡，我之娶亞玉珊番呢做

心抱係報恩嘅(一才) 我娶玉珊番呢唔係報怨嘅(一才) 你為乜野事幹拈住枝佛杖呢打到佢咁

樣(介) 玉珊，玉珊，佢點解會將你打成咁慘厲。(攬玉珊喊介)

(玉珊一路喊一路口古) 奶奶，呢次係你累死我叻奶奶，奶奶我錯叻，我唔應該攤咗你個三百兩銀，

更唔知道你乜嘢事都話比個仔知道，唉，白銀三百兩就送我天國魂歸。。

(元素向煙橋駛莫名其妙的關目介)

(煙橋細聲向元素咬耳朵介)

（元素如夢初醒內愧於心介）

（飛燕借意走埋向枱上之藥點頭明白介）（人有人做戲，自己有自己的戲）

（夫人先鋒鉞火介口古）亞齡，我幾時有將三百兩銀嘅事幹講比你聽，更估唔到你含血噴番自己個老母，就算你嫌佢出身寒微，你可以唔娶佢，你為乜野事幹要快一時之情慾，而卒之將佢致命於無情棒下，等我受世人恥笑呢忤逆仔。

（道齡悲咽口古）亞媽，我而家想誓願，菩薩又聽唔見，佢重使有令我可疑之處，我亦無膽殺妻。

（慢的的望天標眼淚介）

（煙橋口古）嘩，所以話賤骨頭，到底都唔享得富貴福嘅，死咗就娶過一個之嗎，宦海侯門，娶媳何愁無佳麗。啫

（元素火介白）亞爹（口古）在咁嘅情形之下，你唔應該講出一句咁嘅說話，其實我個心都唔知幾難過，幾後悔（拉橋台口）假如我唔係你嘅女，我已經將你嘅罪孽揭發出呢。

(玉珊喘氣白) 奶奶，我唔係你個仔打死嘅

(夫人跣於地上抱玉珊大喊介白) 玉珊，你唔駛臨死都重要顧存亞齡(介) 家嫂，千日都係肥奶奶累
咗你，你唔好扯住，你要等肥奶奶陪埋你一齊至好扯呀(婆媳抱頭大哭介)

(夢樓拈白銀一百兩鬼鼠鼠上見狀則狂奔入房慢的的關目一輪先鋒鉞執齡台口火介口古) 哦，我知
你為我嘅原因，而致玉珊於死地，我大早就知道玉珊一入侯門，就等如永淪於地獄(一才) 怪
不得話侯門似海深(一才) 喪盡幾多紅顏薄命(一才) 哈哈，鄭道齡，我要替亞玉珊報復於今
時此際。(在靴拈插仔出介)

(道齡重一才慢的的火介口古) 我已經憤火中燒，到而家都無可發洩(一才) 你憑乜野瓜葛接受玉珊
白銀三百兩(一才一巴) 你憑乜野淵源，狂吻翠鬟於臨別(一才一巴) 好啦，我亦都唔想做人
叻，我唯有把胸膛挺起，你拈住把刀照拈落呢。。啦(介)

(夢樓先鋒鉞拈刀欲刺介)

(玉珊冲前兩步慘叫白) 唉，罷了我地枕畔夫郎，罷了我地難中知己(乙反中板下句) 垂死鳥鳴哀，僅餘三分氣，已不願把絮果重提。呢一位小夢樓，確是我知己良朋，今夕求儂救濟。漫說侯門似海深，休說蕭郎成陌路，彼此都要互助，提攜。信是天妒紅顏，我似飛絮飄蓬，怎享得人間富貴。垂死亦□□念，先拜謝婆婆關注，再偷眼望弱妹，仍是小孩提。(花) 此際淚已成枯，唉，人亦將離俗世。(悲咽白) 我一世嘅責任，只係得一個妹，你地抱佢埋呢比我睇吓(介) 我唔希望佢將來嫁落侯門，我得到一個咁慈祥嘅家婆(介) 我得到一個咁良善嘅丈夫(介) 我都要死於侯門，幫兇者，冷眼包圍之下(一才) 一切嘅事我唔願講叻(介) 表姑娘，我知道你係一個非常純潔嘅少女，亦難得你今晚睇住我死得咁淒涼，我呢個弱妹不如交界你湊罷叻(慢的的欲講下去已不能開口，倒於夫人懷中)

(元素接斗官慢慢的跪下乙反滴珠二王下句) 更令我羞慚掩面，難得你有此寬恕行為。只愧一念行差，累到你收場慘厲。(悲咽白) 表嫂，翠鬟交咗畀我，我無論如何都要繼承你嘅遺志，其實

我雖不殺伯仁，伯仁為我而死，叫你見夢樓又係我，暗中通知表哥又係我……

（夫人一才發覺玉珊已死喊介白）我我我，我也嘢叫衰女，玉珊已經扯咗好耐叻

（道齡先鋒鉞撲埋擁屍哭相思狂叫介）

（夫人叫梅香抬玉珊入書房然後辦理後事介）

（梅香抬玉珊衣邊下介）

（夫人火介口古）畜生，你重跪嚮處做乜野呀，我都想陪埋個心抱扯嘅叻，不過我有面目重見泉下嘅

金蘭姊妹，你害到我生又唔生得（一才）死又唔死得（一才）從今晚起，我唔會再認你呢個忤

逆仔。扯啦，我唔識你

（道齡喊介白）亞媽（口古）我亦都皆灰萬念，假如我唔係念在你好比殘年風燭，我都唔願再嚮呢個

恨海沉迷。。（跪下牽衣哭介）

（夫人火介口古）我以後除咗對住觀音如來之外，我亦都再有面目見人叻，我嚮寺門病咗三年，三年

內唯一嘅願望都已經冇咗叻，冇個咁嘅衰仔嚮處故然冇用（一才）我都唔願食人間煙火，你對住我都冇乜謂。（趕介）

（道齡重一才慢的的口古）我而家覺得定海禪師嘅說話一的都有錯（狂笑介）好啦，我要塑一個亡妻像，向寺間借取紫泥。。（頓足瘋狂下介）

（夫人豪無感覺唸佛介）

（元素白）姨媽，我為成全呢個責任，我以後都搬開住叻，我扯叻（欲下介）

（夢樓先鋒鉞搶斗官口古）翠鬟萬不能比你養嘅，亞玉珊臨死嘅時候已經失咗知覺，你呢種蛇蝎心腸，點可以把死者亡魂安慰。

（元素喊介口古）夢樓兄，請你比我懺悔，我寧願唔嫁，自己呢捱都要贖取我今時嘅罪過，如果你唔相信我嘅，你可以時時監視住我，睇吓我對佢是否有刻薄行為。。

（煙橋口古）亞女，你為乜野要捱埋比人地食，你扯我都扯，同理一齊。。叻

(元素口古) 嘿，你唔好跟住我叻，假如你唔折墮，我都唔知個天點懲罰你呢種辣手行為。。(與夢

樓同下介)

(煙橋怒白) 我駛靠你咩衰女，我有大姨靠(埋奉承白) 大姨，你都要比幾百兩銀我，等我辦理喪事，

等我將亞玉珊風光大葬都好嚟

(夫人白) 扯，我唔識你(喝梅香拈掘頭掃把趕煙橋介)

(煙橋被趕下介)(寶子)

(夫人食住寶子在枕頭底拈出紅雞蛋及糖蓮子台口關目一輪面口啞相思完花下句) 想食泥重易過食紅

雞蛋，傷心事就慘不堪題。。(白) 我真係宜得去拆咗間金花廟(下介)

(落幕)

(第四場) (北京東華門外青風巷)

——幕序十五年後——

青風巷為北平富庶之街，時宋室已為金人統治，街道應有特別標幟，什邊巷口，正面牆，衣邊佈一富家後苑門，略近衣邊有石長檣一張，什邊台口有大樹一棵(預定踏腳地方可以隨時攀上)下有矮牆，圍住羊群數隻，遠景為玉泉寺，衣邊有矮花

(開邊開幕)(譜子)

(元素(略淡素但都是貧窮)食住譜子衣邊後苑門上介拈花灑淋花並拈掃把掃落葉唱主題曲「苦鳳怕鶯憐」牧歌)「孽緣債，滄桑劫盡如花態，無聊賴，飄飄寄守天涯，孽債都經已，佛前參拜，盡了曬，十五載鴛鴦劫，懨懨病態(長二王下句)卸卻了金釵，紅花不復戴，颼颼情淚，幾盈懷，一點閒愁，無處賣，閒來捲翠袖，日暮掃青階，乳燕今時，經養大(乙反)不堪再臨春水

照，我經已老去，形骸。。寄寓金陵，也不過是庸人，自解。（小曲雙星恨）落花已長埋，堪嘆誤我冤債，孽債，自悲夢難諧，從前從前痛分釵，雪夜雪夜那堪目覩目覩瘋顛態，心怨艾，命太乖，分河劃界，自把孤雛帶，盡把痴心破壞，拆釵復合釵，不似梧桐葉舞青階（乙反中板下句）收拾破碎心，珠簾不捲，拼把玉葬，花埋。。惱煞小夢樓，好似一隻粉蝶痴情，繞向我飄飄裙帶。前月對菱花，已漸覺微蒼兩鬢，才有羞把魚水，重諧。。回首望西秦，雖是樹倒巢傾，白髮對我依然，愛戴。一念到後母心，若不是乞憐搖尾，未肯離北里，返秦街。。（正線花）黃昏後，掃葉庭前，都好過百無了奈。（白）眨吓眼就十幾年叻，我一直就嚮呢處替人做管家，翠鬟已經大個咗叻，頑皮百厭到不得了，佢日頭就我地少爺仔出去牧吓羊，我就兩個相依為命（介）前個月，我已經嫁咗比亞夢樓，我都話唔嫁嘅叻，不過亞夢樓十幾年來待我真好（介）我同佢都重係分開住，我一時點能夠離我嘅故主呢，佢時常嚟睇吓我就算叻（輕鬆寶子打掃介）

(翠鬟(背玉簫牧羊女身)預來一袋食住寶子一路作趕羊趕雞入籠介，台口花下句)帶得羊群歸寮後，脫開草履換弓鞋。我雖是山外牧羊，仍是嬌主縱壞。(白)蝦，今日啲羊咩就好聽話，最衰啲雞仔唔聽話嘅叻，總唔肯食野，唔知係發雞瘟呢，成袋米都重番嚮處，總唔肯食嘍，算叻，番去換過件□衫先(欲入衣邊一才見素在白)姐姐

(元素白)翠鬟，你番啲嚟叻

(翠鬟白)唉吔，姐姐，你年紀都唔係輕嘅叻，重成日做嚟做乜野吖，你睇吓，腰都攣攣地，留番嚟比我同你做啦(介)擔張橈被你坐嚮處抖吓叻(非常精乖擔橈台口介)

(元素坐下白)翠鬟，乖叻(口古)你雖然叫我做姐姐，但係我大你成十幾年，教得你，話得你，你一牧完羊番嚟換啲件衫啫，就唔見啲你叻，到底你去邊處呀，你唔好練曳學壞。呀

(翠鬟口古)姐姐，我坦白啲同你講啦，我唔細嘅叻，差兩個月就十八歲嘅叻，個心就未免話唔野嚮嘅，我識埋好多牧羊仔架，牧完羊，食完飯，我唔係出去同佢地拍吓拖，行吓街。囉

(元素一才關目口古) 唉吔，翠鬟，我唔准你咁放肆，十七歲重話好細個啫，姐姐冇野怕，最怕就係你將自由誤解。

(翠鬟口古) 姐姐，你真係慳埋喺屋企唔知世事叻，青風巷三號個個英妹呀，十五歲幾之嗎，舊年都嫁咗叻，今年生理仔，成晚都噯姑乖。。

(元素一才慢慢的薄怒介白) 翠鬟(花下句) 小鳥不知世情薄，似未應有呢種蕩漾情懷。。此後你牧罷歸來，應受我從嚴警戒。(白) 翠鬟，此後你番嚟，一步都唔准你出去，唔係就連腳仔都打破你嘅，你知嗎，你嘅親家姐死咗，我代替佢來湊大你，如果你有乜野行差踏錯，我呢十幾年嘅心血，就白白徙咗咯，翠鬟，我估唔到你鬼咁聰明咁鬼曳

(翠鬟晦氣白) 就算想嫁，都唔係點曳吔，如果咁都曳架，我相信冇人曳叻

(元素薄怒白) 蝦，駁嘴添係嗎，係唔准你嫁住

(翠鬟頑皮白) 有乜理由啫

(元素起身握拳盟介白) 乜野叫做冇理由 (略帶老態介)

(翠鬟學其老態一輪白) 唔准，唔係唔准咯，駛乜又咁又咁啫 (花下句) 少女心情，好似花怒發，又點似得你地的老樹枯柴。越係聰明人，越會把愛情分解。(白) 姐姐，我而家唔係嫁，不過你提起嫁個問題，我又即管同你研究吓，我都有相當理論嘅嘢，一個人想嫁唔論年齡嘅，十五歲亦好，五十歲亦好，除非唔想，一想就嫁嘅叻，喲，亞姐姐，你大咗我十五年，都已經三十年嘅叻，女人三十爛茶渣，入老個類嘅囉嘢，點嫁你早又唔嫁，係都要等到上個月偷偷地嫁咗呢，就因為你想咁解啫，唔通想吓都唔比我想吓，姐姐，冇口鬧人，冇口鬧自己叻

(元素重一才躡椅慢的的啼笑皆非介口古) 翠鬟，你講得啱，我都知道你勢利嘅叻，你呢隻鐵嘴雞，釘得死人，實在我唔應該阻止你，哼，你心目中梗係有咗人喇，否則你今晚同我講說話，斷唔會咁口快舌快。係唔係吖

(翠鬟口古) 冇嘢冇嘢，真係冇嘢，我可以誓願，不過有起上嚟，亦好易嘅啫，眨吓眼，就有嘅啦，

嘿，愛情嘅野，點話得埋。

（元素掩口笑介白）翠鬟，你唔好激死我叻，番入去食飯罷啦

（翠鬟白）點得呀，啲雞都未餵，等到佢餓啲，我餵番佢至番入去架

（元素花下句）總望你有識人慧眼，莫辜負我一點慈懷。我為誰辛苦為誰忙，唔係咁輕易把春蛾你

湊大。（白）翠鬟，記住我呢幾句說話拉（入介）

（翠鬟輕鬆白）好叻，姐姐唔管我，平地封皇（向觀眾）以後，除非我唔鍾意邊一個，如果我鍾意邊

一個嘅，即刻嫁得，嫁得（坐於橫石橙上，戩高腳吹橫笛介）

（道齡（化緣和尚身背小泥像，預青磬紅魚化緣袋）一路敲木魚上介長花下句）朝攜帶，晚攜帶，十

五年來，冤未解，半生恩義，未曾埋，八千里路還花債，踏遍天南地北，放蕩形骸。做一個

化緣僧，化吓萬人緣，都好過對住炎涼世態。（白）十五年來，我都係以抄化維生，我用一把

紫泥，替亞玉珊塑咗一個泥像，預咗佢係背後，十幾年形影不離，我一路行，一路同佢念經，

不知不覺行咗八千里路叻，而家又流浪番嚟北平，我已經有咗皆灰萬念叻，削去三千煩惱，一切都算叻（一路敲卜魚介白）施主化的香油，化的白米

（翠鬟一才紮覺白）想第二樣就難啫，想白米又容乜易啫，喲（撒一楂落地）喲（成袋檸曬落地介）
（道齡一才關目白）唉吔小姑娘，你係有心施捨就好好地比我吔，點解撒到成地都係呢

（翠鬟白）我餵慣雞吔嗎，的手勢係咁樣嘅叻和尚

（道齡白）罪過罪過，阿彌陀佛（跪於地上掃米介）

（翠鬟台口白）衣衣，和尚就見得多叻，未曾有見過和尚預住個公仔嘅嚟，幾趣吔幾趣吔（急足埋花基拈較剪躡足埋齡背後剪去繩，拈起公仔一看閃開台口白）衣衣，點解隻泥公仔咁仔我嘅呢，擺便宜咩，收埋佢至得（爬上什邊樹將公仔於於樹頂，然後坐回石橈印印腳若無其事介）

（道齡掃好米起身白）多謝曬叻，小姑娘（一才仄才介）喂，點解前重後輕嘅呢（以手一摸背後愕然花下句）十五載共佢相依為命，緣何一旦竟離懷。。塑像帶有真靈，失去無從再買。（白）弊

叻，行吓，跌咗亞玉珊都唔知添，跌咗係邊處呢（隨地搵介）

（翠鬟白）你唔駛搵叻（花下句）和尚萬不能預公仔，你不倫不類，總唔怕受人擠。今日佢已飛上枝頭，你以後就可以解除預帶。（白）我同你搬上樹叻，有本事你自己上去擺番佢落嚟啦

（道齡一才怒介白）你樣樣都可以驚動，萬不能驚動我呢個泥公仔，你開嚟

（翠鬟白）開嚟唔係開嚟，怕你呀（介）

（重一才慢的的二人貼面關目若有前緣介）

（翠鬟連隨拉橈白）坐啦坐啦（口古）我以為化緣和尚就梗係邈邈到好似坑渠老鼠一樣嘅叻，點解你又生得咁目秀眉清，雖然年紀似乎係大啲，倒還有翩翩儀態。

（道齡坐下口古）小姑娘，我共你亦似曾相識，你呢種撩人面目，令我頗費疑猜。

（翠鬟乘齡不覺搵起其僧帽一看擲介口古）唉吔，原來你重有頭髮嘅，有頭髮就唔好學人裝和尚啦，

睇你好貌好眉，做乜你週身古怪。架

(道齡口古) 蝦，你連我頂盔都射咗去，你真係百厭到乜野都敢做嘅叻，我話比你聽啦，原本我的頭髮就剃咗好耐嘅叻，不過我重記舊時，玉泉寺個定海禪師佢話我孽緣還未了，所以我至帶髮修行。啫(白) 不過都係冇嘅叻

(翠鬟白) 好彩你唔剃(雙) 剃親呢，就徙咗佢(白杭) 你點捨得温暖人生，點捨得花花世界，所謂俗世塵寰，係有都有債，嘅叻，有錢債，有孽債，有花債，未必敲吓卜魚就了得曬(介) 你嘅年紀大，唯是好像態，做乜白白無端就要齋戒，我對你好同情，我對你好了解，我已經食得人地茶禮，咪當我人細鬼大，你睇我襟上一朵花，腰繫紅綾帶，如來佛祖見我亦生情，包管佢一步跳出青蓮界，咪剃光個頭，剃光就曬鬼徙，留番佢啦和尚，你重有一番世界，嘅(打齡一吓介)

(道齡口古) 越聽越熱越唔似樣，我都要扯叻，唔該你同我上棵樹扯番個公仔落嚟啦，我寧願對你千拜百拜。(執僧帽戴回介)

(翠鬟再將其僧帽擲出口古) 蝦，同我傾吓偈都唔得，真係枉我講到喉乾舌燥都感化唔到你，唉吔，我失望叻，一隻泥公仔有乜野咁緊要吖，有拖唔怕，寧願預佢行街。

(道齡白) 小姑娘

(翠鬟白) 一係就唔好叫，叫親就唔好叫個小字，叫大姑娘

(道齡白) 大姑娘，我呢隻泥公仔有好深長來歷架，睇你咁聰明，你擔張橙坐嚮處等我講比你聽啦

(翠鬟白) 擔張橈就得，坐嚮處就唔得，我成世人都坐唔定嘅

(道齡白) 唉，小姑娘(介)(中板下句) 我用紫泥雕，一個亡妻像，未開言已血淚，灑襟懷。往

日枕邊人，何只淑德賢良，好一副如花，美態。我誠，誠就誠福薄，個晚我無心碎玉，誰不料拗折，鳳凰釵。十五年，憶念亡妻，恨不能引刀，成一快。無奈有白髮高靈，慈雲色變，不認我作膝下兒孩。(七字) 所謂因果循環難分解。想我亦忠亦孝要修齋。越多情，越多債。債債債，毀了形骸。怪不得話放火殺人金腰帶。一生行善要着草鞋。(花) 不怨天，

不尤人（盟介）唯有自嗟自艾。（喊介）

（翠鬟一路聽一路垂淚，最後成個定曬形介）

（道齡仄才白）衣衣，做乜你成個傻咗咁呀

（翠鬟扁咀白）梗係傻啦，原來你咁孤寒，咁陰功（乙反長花）塑像紫泥搓，帶有一段迷人孽債，玉郎非福薄，我話福薄是裙釵，千里遙遙相攜帶，枕邊情愛未湮埋，我願身代泥人，把你嘅痴情解，茫茫苦海，又點怕靠岸無崖。放盡一點柔情，向住你個痴人，分派。（含情脈脈白）呢

幾句說話你明嘅啦

（道齡口古）我明白，不過好罪過，漫講話曾經滄海難為水，就算計起年齡，人地笑我再戀如花少艾。

（翠鬟羞盟介口古）我完全係同情你一個咁好嘅人，唔應該收場咁慘啫（細聲）我歡喜你，你歡喜我唔係得囉，你估駛打嚮頭鑼叫通街。咩

（道齡口古）大姑娘，我好多謝你，唔該你上去擺番隻泥公仔比我，我離開咗佢就百無了賴。

(翠鬟頓足怒介上樹拈回公仔，慢的的台口憤然指公仔口古)我係肉做嘅，你係泥雕嘅，估唔到佢迷戀泥人情影，辜負我血肉情懷。。(白)我髒(將泥人擲於地上先鋒鉞屣介)

(道齡重一才如瘋狂狀慢的的關目花下句)驚見紫泥踏碎，飄飄珠淚又縈懷。。快快快，快往梵台，莫再惹一身是債。(欲下)

(翠鬟先鋒鉞拉住袍角問白)你去邊處

(道齡白)我去玉泉寺

(翠鬟白)哦，我一陣去搵你傾偈呀吓

(道齡掬開沖下介)

(翠鬟叫白)喂喂，你叫乜野名至得架(介)(坐於台口掩口笑介)以我一個咁嘅人，會中意到佢咁嘅人(介)唔奇呀，乜野都有緣份嘅嗎

(元素食住此介口卸上介白)翠鬟，你好番去食飯囉噃(花下句)已是黃昏過後，月照庭階。。你好

似有萬種思潮，更何事含羞弄帶。(白) 番入去食飯啦

(翠鬟白) 咪嘈我啦 (雙) 我想緊野呀 (自言自話) 去呢，就抑或唔去呢

(元素一才關目口古) 哼，翠鬟，你曳叻，我睇見你個鋪衰靜，就知道你七八成，你正話梗係見過男人定叻，唔係點會成個傻曬。

(翠鬟口古) 姐姐，我有騙到你吖，我都話過好容易嘅叻，不過我識個唔係男仔係男人，噯，佢個樣瀟灑，哈，冇啲可彈，冇啲可屣。

(元素一才氣結忍住氣口古) 翠鬟，我忍咗你好耐嘅囉，就算我錫你，都萬不能我退一步，你進一步 (火介) 小講啦，你識個個男人，幾上下年齡 (一才) 係士農工商吖，抑或優界。

(翠鬟口古) 你問佢年紀呀，都有三十零四十嘅叻 (一才) 佢唔係士農工商嚟架，佢唔會做戲嘅，佢另外一行架，你估佢做乜野架，佢係化緣和尚，預住個佛祖招牌。

(元素重一才力力古氣至手震怒白) 唉吔，翠鬟，你等亞姐姐好好地死，唔好激死我叻，我……我唔

准你識埋曬啲化緣和尚（一才）

（翠鬟白）又試唔准囉，我唔准你上一個月靜靜地嫁比我二哥哥得唔得吖，得唔得吖（刁辣）

（元素憤然打其一巴花下句）小翠鬟，你不能搵死我月前一嫁，便可辜負慈懷。我為乜野含酸茹苦十多年（一才）我怕你受了色情拐帶。（悲咽白）你估我好想打你嘅咩，你問吓你自己抵唔抵打，行埋嚟比我錫番啦（介）

（翠鬟行埋突然打素一巴介花下句）你不能把我自由剝奪（一才）任情打罵，當我係小兒孩。壓力一分，更惹起我瘋狂變態。（先鋒鉞欲下介）

（元素食住先鋒鉞執住白）你去邊度

（翠鬟爭紮介白）我去玉泉寺

（元素糾纏介白）我唔准你去

（夢樓食住此介口什邊卸上介）

(翠鬟白) 我係要去 (先鋒鉞將元素推躓地瘋狂欲下介)

(元素躓地叫白) 夢環你同我拉住佢

(夢樓沖前執住翠鬟介)

(翠鬟蠻極糾纏咬樓手而沖下介)

(夢樓埋扶起素口古) 元素，你都辛苦咗咁多年叻，成日霎住亞翠鬟做乜野吖，既然係相依為命，就

無謂成日嘈，成日噬。啦

(元素悲咽口古) 夢樓，我做人都無乜趣嘅咯，亞翠鬟去結交一個化緣和尚做情人嗰，你話我多年心

血，你話係唔係白屣。。呢 (喊介)

(夢樓悲憤口古) 亞翠鬟太唔識性，點解你唔搵支沙籐打到佢腳都斷咗嘅，佢不能辜負你一生偉大。

(元素一路喊一路白) 重搞到搵沙籐打佢添 (口古) 我輕輕打佢一巴啫，佢都大力摑番我叻，千日都

係叻，鬼叫我唔爭氣上個月嫁咗比你咩，我都未曾開口話過佢，佢就聲聲把我擠。。

（夢樓重一才花下句）春蛾不解人間恨，你縱有千愁萬怨我分排。。忍見淚滿桃腮，莫為春蛾苦□。

（拈巾為抹介）

（元素突然推開白）夢樓，呢個唔係抹眼淚嘅時候叻，你快的趕去玉泉寺，睇吓佢結識邊個化緣和尚

啦，去啦，去啦（催介）

（夢樓白）係叻，我而家去叻，睇吓邊個和尚咁大膽，我連個和尚頭都扑穿佢嘅（下介）

（元素花下句）難洩心頭恨，含淚望天涯。。（白）番去交帶落一聲，我都要去睇吓佢至得叻（急足

下衣邊介）

（落幕）

(第五場)

(佛殿景)

衣邊台口紅几及椅，上有殘燭及小卜魚，全場沉靜肅穆

(排子一句作上句開幕)(寶子爐香讚)

(老夫人(掛佛珠，老態龍鍾，滿面病容)拈拐杖從衣邊角上介台口花下句)目將盲，人更老，依然在塵世受煎熬。一爐香，半夜愁，長對如來佛祖。(埋衣邊枱坐下敲一輪經馴着介)(寶子爐香讚越陰沉越好)(老夫人臨睡時吹熄燭全場燈略暗)

(道齡食住譜子什邊介，走埋向老夫人作可憐關目一輪然後擔橈開台口，再搬蒲團開台口，然後埋扶老夫人坐於正面椅，跪在蒲團叩三吓嚮頭然後慘叫介白)亞媽，亞媽

(老夫人睇眼朦朧醒介白)你係邊個呀

(道齡口古)亞媽，我係亞齡呀，你睜開眼嚟睇吓我，你見到我應該好歡喜叻，百善孝為先，所以我

終有一日回歸見母。(叩頭)

(老夫人將橈略移開作討厭狀介口古) 亞齡，你重未死咩，唉，亞媽敲錯經，唸錯佛叻，我敲經念佛就想你快啲死，點知你呢種人都可以生嘅，亞老佛爺，亞老佛爺，你未免太過糊塗。

(道齡再跪埋兩步喊介白) 亞媽，你唔記得你係寡母婆守大我嘅咩(口古) 你為乜野事幹咒我死，我我我我死後誰人掃你墓。

(老夫人冷笑口古) 寡母婆，寡母婆守大籠雞守大籠鴨都好過守大你叻，乜我死咗都有墳墓嘅咩(喊介) 我死咗邊處有棺材架(火介) 亞齡，我話比你聽呀，我死咗之後，清明重九你咪登高。

(道齡重一才狂叫介白) 媽(花下句) 媽罷媽，往事經已煙消雲散，你見否我今時着住一件佛家袍。

十五載參盡前緣，媽罷媽，你能否准我將你膝頭一抱。(跟埋攬膝激激介)

(老夫人一才起面口相思喊介白) 齡，你抬高個頭望吓我(花下句) 我不是饒恕你既往，我不過是垂死哀號。好啦，准你叫叫叫，再叫多聲，事關仔慳情，千日係都牽腸掛肚。(白) 齡，你知

錯喇咩

(道齡口古) 媽，我知錯叻，我而家都萬念皆灰，我準備見你之後，一切都了曬叻(在懷化緣袋拈出較剪) 媽，我跪在佛前，你拈住把較剪，為孩兒剃度。(跪下介)

(老夫人拈起較剪重一才慢慢的憤至無可壓止口古) 齡，拈住把較剪同你剪曬的頭髮我就做唔到叻，等我拈住把較剪將你兜心一插，送你落艷都。啲(先鋒鉞撲埋一插介)

(道齡一閃插在臂上流紫標口古) 亞媽，正話都原諒我，點解而家又對我咁兇狼殘酷。

(老夫人慘笑介口古) 你估我原諒你咩，笑話，我之最後肯認番你，就唔想自己一生行善，而絕了後代之喺，估唔到揸住把較剪叫個老母嚟同你落髮(火介)我唔識你，我唔識你呢個不孝嘅叛徒。

(埋打齡兩巴一路白) 我唔識你，我唔識你(震下衣邊介)

(道齡伏於椅上狂叫亞媽不止，啞相思介)

(翠鬟食住啞相思靜靜躡足上，在齡背後拈其僧帽飛去，然後一才關目白) 唉吔，你雙手做乜野呀

(道齡重一才見鬢，突然先鋒鉞攬住鬢口古) 小姑娘，我即刻要同你結婚(一才) 除咗小姑娘你，冇人願嫁我嘅叻，係只有你，至可以同我成存孝道。啫

(翠鬟口古) 唉吔，乜你咁嘅，嚮屋企門口，我向你表明心跡嘅時候，你又懶大枱咁，而家見到我，好似成個發曬狂，唉吔，我唔鍾意架，我鍾意你定地，唔歡喜你啲動靜好似浪子登徒。

(道齡再執住鬢口古) 大姑娘，你一於嫁我啦，我至希望你係即刻同我生番個仔(一才) 最啱就係三年抱兩，越多越好。

(翠鬟盟介頓足口古) 唉吔醜死呀醜死呀，咁嘅說話都講得出嘅，你估我真係咁隨便嘅，冇大紅花轎坐，我都唔肯立亂賦夭桃。(頓足扭紋介)

(道齡頹然坐下花下句) 傷心一點慈母淚，都未閉關做禿奴。請恕我身世孤寒，請恕我無常喜怒。

(掩面悲泣介)

(翠鬟不忍回頭望介白) 而家我唔可憐你孤寒咩，如果我唔念在你孤寒，我就唔嚟見你啦(花下句)

孤雁離人一去後，你知否我瘋狂決絕別家廬。媧皇煉石補情天，你不用時不用苦。（埋為齡抹淚介白）喊乜野吖，快的換過件衫，咪扮得咁古靈精怪啦，你睇吓啦，虱乸都有叻（介）我都唔知係唔係前生有冤嘅叻，咁歡喜你（介）

（夢樓面塗油懷插仔）捲住一件海青食住此介口什邊卸上倚金柱撐實面口喝白）翠鬟你行開

（翠鬟一才紮覺連隨閃開介）

（重一才慢的的）（夢樓與道齡關目介）

（夢樓行開衣邊台口白）翠鬟，你開嚟（介）（口古）你即刻番去屋企（一才）以後，你就唔准再嚟

（一才）你唔好問我乜野原因，我也唔願意同你講出乜野蘭因絮果（一才）總之我叫你咁做，

你就咁做。（喝白）扯

（翠鬟冷笑口古）亞爹，你而家趕我扯囉嚟，點解你上個月，有一晚你賴係我元素房處，我趕你又唔扯呢，喂，知此知彼，百戰百勝呀，唔該唔係嚟處鬼殺咁嘈。。

(夢樓重一才氣結悲咽口古) 翠鬟，我唔係幾好脾氣嘅嘢，如果我手重的就會打傷你嘅囉嘢，你扯唔扯，你唔好同我再盟嘢，你都已經朦朧嘅叻，講極你都唔知我待你好。嘅

(翠鬟口古) 夢樓亞懂，咁盟又唔好砍個頭埋條住處死咗佢，你唔好脾氣就抑或我唔好脾氣吖，抵得你個衰樣吖，日冤夜冤，冤咗十幾年，上個月至比你冤到啫，咁快就咁惡睇叻，喂，你就得意情場叻，有歸宿叻，咁我呢，須唔須要搵丈夫。架

(夢樓重一才慢慢的將鬟兩巴□先鋒鉞推鬟衣邊躡地花下句) 小翠鬟(一才) 休放蕩(一才) 你焉知情海有波濤。情天劫(一才) 你呢隻小綿羊(一才) 不應再伴歸來猛虎。(拈插仔瘋狂迫介白) 你扯唔扯，你扯唔扯

(翠鬟在地上白) 哦，而家揸住把刀拋我呀，你問吓我怕唔怕啫，試吓吖，試吓吖(介向齡) 你唔駛怕佢架，我有王管嘅，我一陣挽飯來比你食

(夢樓瘋狂先鋒鉞趕介)

(翠鬟整一鬼面然後下介)

(道齡台口向樓白) 夢樓(口古) 我估唔到而家至見番你，我亦知道亞翠鬟就係玉珊當年嘅愛妹，你唔應該趕咗佢扯吖，你知唔知道吾亞媽，想將孫抱。呀

(夢樓重一才慢的的口古) 亞齡，害死咗個大嘅，重想害死埋個細嘅係嗎，你想要娶亞翠鬟就難叻，在今日，你唯一可以娶得到嘅，你估係乜野呀(火介) 就係我呢把手上刀。(向齡一揚一掌推其躑地介)

(道齡躑地先鋒鉞埋口古) 喂，我都打得嘅嘍，你唔好蝦得我嘍，累到我負於愛情，虧於孝道，十五年前辣手摧花係為邊個(一才) 你要知道趕狗怕窮巷，趕人防絕路。

(夢樓狂笑介白) 道齡(口古) 玉珊由你而死，我夢樓由你而捱盡十五年，我都唔怪你叻，我希望你唔好再作孽，疊埋心水做禿奴。。把啦(一掌打齡跌埋正面椅躑地白) 你唔好起身呀，你起親身我殺死你架，等我拈把較剪同你剪曬的頭髮(先鋒鉞撲埋衣邊枱拉較剪介)

(元素(雪衣雪帽)食住此介口卸上走埋齡旁慢的的作垂憐關目口古)道齡，抵你今日咁折墮嘅，我都好可憐你，在呢個時候呢，我可以用手扶你起身，但係你想要娶亞翠鬟呢，就做唔到。叻(扶齡起身介)

(夢樓一才呷醋介)

(道齡口古)元素，我娶亞翠鬟係唔啱嘅，唔啱我娶番你吖(一才)十五載重圓破鏡，免至我孝道全辜。。

(夢樓重一才更酸介)

(元素一望夢樓略帶驚慌苦笑口古)道齡，你唔好再夢想咯，你呢種人配有歸宿嘅咩，前個月，我已為夢樓之婦。

(道齡重一才口古)唉，我呢世人都夠冤枉叻，一個又死咗叻，一個又嫁咗人叻，剩番一個又唔比我娶，人逢絕，唯有慘痛狂呼。。(喊介)

(元素不忍遞巾與齡介)

(夢樓酸介白)我唔准，元素你行開(介)(花下句)昔日天鵝為誰潦落(一才)前塵如夢化為無。

昔日操刀餘情(一才)相見未應重照顧。(悲憤白)元素，我唔歡喜你見佢，你扯啦

(元素白)係咯(花下句)摧花辣手逢天罰，道齡你終是劫數難逃。。重今一別不回頭，往事化作迷

濛煙霧。(白)道齡，比心機捱埋收尾個兩年啦(頓足下介)

(夢樓滋油介白)喂，元素係我嘅叻，唔係你嘅叻，你乜野都有嘅啦，攞住個個小木魚落棺材啦(下

介)

(道齡嘔紫標介狂叫白)做好人有乜用吖，為乜事幹要求神，為乜野事幹要拜佛，佛公都有半時肯開

眼嘅(先鋒鉞分邊大亂經堂掃紅魚青磬完花下句)皆灰萬念，願隨風雨洗塵污。。(於狂風暴

風中下介)

(落幕)

(第六場) (暴風雨疏林古剎新景)

衣什邊大樹，底景有立體古剎一間，並有佛幡，上掛燈籠四隻，衣邊樹下，圍以矮竹籬，內有羊群，旁有稻草

(排子頭一句作上句開幕)(譜子)

(效果配風吼聲，羊叫聲)(遠景之佛幡為暴風吹飄於天際，燈籠搖搖欲墮介)

(翠鬟(牧羊女身)於風吼聲中什邊上主題曲「雷雨度殘宵」長花下句)颼颼風力猛，撲索雨中行，

緣窗綺夢未拋殘，朔風一怒吳江冷，深宵輕扣佛門環，粉拳欲碎琉璃盞，未許鄭郎把佛參。

疏林煙霧正迷濛，山雨欲來情未減。(小曲相思淚) 暮雲飄散，風雨飄泛，雨中悲雪雁，夢

冷心未冷，佢閉關我欲扣關，淚和雨背人彈，夜已漫漫，顛撲中一嘆，好似花飛飄瓣瓣，淚眼

偷自盼，遠燈霧雨間，狂雨佛殿行（慢板下句）一串殘燈掛佛牆，斜倚薰籠情蕩漾，倚欄若醉，好一比孤燕呢喃。晚來一陣風，驚覺銀屏夢，倚遍十二瓊窗，未把輕愁，吹散。未許一見便鍾情，姻緣似是前生定，妾如枝上葉，郎似，劫後蠶。只餘一點靈根，兩重幽恨，夢裏不知世態炎涼，醒來只覺紅衾，香冷。（食住冷字轉花好月圓）風吹散見他難，甘心處患難，他鄉客情還未冷，心中愛，未等閒，沉吟，於今晚，相見難，欲見難，寂寞，倚翠欄，我願隨風飄泛。（反線中板下句）煙霧鎖梵宮，風雨囚一蝶，已是哀怨絕人寰。欲化萬人緣，自笑我撒米青階，把那痴人，戲弄於當晚。塑像紫泥雕，輕掛殘枝上，翻嫌小鳳，刁蠻。誰料佢血淚凝眸，慘似杜宇哀鳴，又好似啼猿，叫喊。一句滄海曾經，又一句巫山雲渺（二王下句）我不覺珠淚，汎瀾。太息人世間，情疏淡，只見有錦上添花，何曾有雪中送炭。方信劫後情，誰個肯重舒溫暖，只配受風雨摧殘。似鶯飛到達蓮台，任教我踏碎了弓鞋，怎奈風姨（合尺花）力猛。（拉腔於風吼聲羊叫聲中欲上石級被風吹跌台口合花下句）（反線二王序束起鸞帶除鞋捲

褲腳唱）那梵宮，接雲霓，怎得吾身如飛雁。風也驕，向我長傲嘯，有樹，亦未敢高攀。。代紅魚，理應陪伴痴人，當念禪台，枯冷。破長風，怎聽魚樵鼓報，過了三更。。泣黃山，響驚雷，好似鬼域泉台，嚇碎了鬢兒肝膽。（拉腔拈起食格藍力古圓台介）

（天幕行雷閃電介）（對狼大聲吠羊叫聲）

（翠鬟大驚擲了食格藍先鋒鉞分邊顛撲台口白）我唔敢去咯，我慳埋羊群處先，避得一陣算一陣（先鋒鉞撲上衣邊山埋羊群之旁搵禾稈住自己暈倒介）

（天幕行雷閃電介）

（道齡（頭陀，狀極潦倒白戰衣，有血跡，捲住一件殘舊灰袍，腰繫麻繩一束，着芒鞋）於狂風暴雨中，從古剎上唱主題曲「願隨風雨化塵飛」餓馬搖鈴）風相欺，雨侵犯，傷心自嘆，有夢已拋殘，人情太冷，半世經患難，徒自悲做人難，唉，不堪顧盼，輕搓淚眼，寂寞怯孤單，悲痛翠鬟，心經看破看破塵寰，欲閉關（乙反長二王下句）拗斷了鳳凰簪，前塵休顧盼，含冤經半世，

血債未清還，當初錯□那無情棒，凌空暴打，幾曾有貼近紅顏。誰料鮮血染羅衫，經已魂隨仙鶴返，屍橫綉閣，玉碎花殘，自顧狀態猙獰（正線）委實令人，齒冷。（詩白）無心輕扣鬼門關。護花寧許把花殘。芳魂已是隨風散。我尚窗前叫玉珊。（孔雀開屏）瘋顛，一盼，一盼，她已她已僵硬，我情狂情狂喚句珊，淚潛潛，故作強蠻（雙）為了江山，誰了惹災難，我負了冤孽，未可未可對人談，流亡走關山，心緒都經枯冷，風雨捲劫雪雁，悟情悟情佛苑參，滄桑經過十八載，心已盡丟淡，不堪重見小雲鬟（雙）熱情，熱情，可讚，可讚，輕憐淪落，巨重舒慧眼（乙反中板下句）對寧不衾影，自慚。說什麼再世重溫，說什麼金鳳情緣，屈指我便情絲，盡滅。只配對佛前燈，只陪伴窗前月，曲終弦斷，此調怕重彈。黃葉秋風，驟雨橫來，我捱不了人情，太冷。半世冤含，願借一抔黃土（正線二王下句）猶勝在此歷劫，塵寰。（二流）百感蒼茫（合）風流雲散。（上）塵世已無戀棧（士）不若樹上投環。（尺）（花）十八載孽債將完，卻不料死在今時今晚。（解繩於狂風暴雨中白）做人都有乜趣，唔恐亦有乜

用，好，狂風暴雨當中，荒山人少，咁樣死得乾乾淨淨（抽繩於樹上行雷閃電介）吓，個雷都蝦埋我，我一生人最微小嘅事都有做錯到，收場咁慘淡都不必講叻，估唔到臨死嘅時候，個天重咁收治我（介）雷公呀雷公，你有你嘈，我有我死，搬石躉投環欲踢石躉自殺介）

（大雷雨從天幕閃電開台口打斷樹枝，風雨聲連續莫停介）

（道齡凌空跌下絞紗再跪埋一看）

（翠鬟食住此介口醒了在禾稈旁偷看介）

（道齡指住樹枝花下句）一雷劈折梧桐樹，可憐我依舊在人寰。天雷亦太不饒人，垂死重依然同我

玩。（憤然介白）又死過（掛繩於另一樹枝作吊頸狀介）

（翠鬟於狂風暴雨聲中白）唉吔，你唔好死呀（雙）我唔放行開去救你呀（狂叫介）

（大雷雨從天幕閃電開台口角再打斷樹枝介）

（道齡包一才躡地憤然介白）唔好咁都好啱，天老爺

(翠鬟急足台口口古)你做乜野要死呢，漫講話我唔想你死，雷公都唔想你死，你係佛苑都話要娶我，點解而家又情如冰炭。呢

(道齡口古)翠鬟，我唔娶得你架，等我講個段蘭因絮果比你聽啦，你嘅的親大姐，亞玉珊就係我以前個妻子叻，我因為一時妒火而打死咗佢，唉，總之我做呢世都好艱難。

(翠鬟口古)我明白叻，我都相信你唔會立心打死佢，如果會嘅，你又點會陀住個泥公仔行八千里路呢，今日以個妹來代替個大姐，好合理嘅，你使乜野心灰意冷。ㄟ

(道齡頹然躓地撫臂痛介口古)翠鬟，以我一個善人，而收場咁慘淡，我一切都睇化嘅叻，唉，我唔願意留在人間。。(喊介)

(翠鬟白)唉吔，唔好講呢的灰心說話啦，等我同你洗吓呢傷口先啦(跪地花下句)借清泉，為洗滌，免至你血迹斑斕。。風雨中，在荒林，我與你同甘患難。(介)(行雷閃電介)

(夢樓扶元素拉小燈籠從什邊上介叫白)翠鬟

(老夫人拈小燈籠衣邊風雨中卸上)

(元素口古) 翠鬟，你跟我番去啦，你都要念在我在風雨中，將你瘋狂叫喊。

(夢樓口古) 翠鬟，我打錯你，但係你要聽你姐姐嘅說話，千祈唔好失足難番。。(無意跌下手上插

仔介)

(老夫人口古) 畜牲，你已經害死咗佢大姐叻，你就唔應該受佢嘅妹雪中送炭。(白) 翠鬟，你唔好

理佢，你扯

(翠鬟悲咽白) 我知叻，等我同佢綁埋個傷口，我就扯係啦，我而家至明白，苦海是塵寰。。

(桂香扶世厚(去職)於風雨中衣邊一路叫元素上介)

(元素跪下白) 亞爹

(世厚白) 元素，你個後母死咗叻(花下句) 女呀，十五載仍歸無日，都是你後母兇殘。。可憐我身

在覆巢，無日不將女兒掛盼。

（道齡乘人不覺執起地上之插仔狂笑白）人地就今夕團圓，令我更加摻眼。生不如死，含淚自戕。

（先鋒鉞欲自殺介）

（桂香食住跪埋執住刀口古）我雖然唔見到你啫，但係十五年來，我聽見你可憐嘅遭遇，我都撫心自嘆。玉珊雖然係你打死嘅，係我害死嘅，因為我怕佢揭發我當年嘅事幹，一切一切都係由我而佈局，我亦自知手段兇殘。你係一個善人，唔應令你收場咁慘。呢種或者係你應有個災劫，我而家都低首自慚。

（夢樓先鋒鉞搶齡之刀兜心刺死桂香介）

（翠鬟撲埋攬住齡口古）所謂再世姻緣，就係實現於今晚。你睇吓我重掛住一隻玲瓏嘅金鳳，等如係我家姊重生。善有善報嘅，苦咗半生，倒未得笑番一啖。你可以重溫舊夢，翠鬟就即係玉珊，玉珊就等如係翠鬟。

（道齡這個分邊望各人介）

（各人俱點頭贊同介）

（道齡攬住鬟花下句）莫道一入侯門深似海，花到枯時又再生。

（眾人同唱煞板）

（落幕）

（尾聲煞科）